

Las Chantinadas da las trais reginas

La Triada cumenza l'onn nov cun in experiment musical tut spezial. Corin Curschellas, Ursina Giger ed Astrid Alexandre preschantan mais per mais raritads or dal fundus da la chanzun populara rumantscha.

BENEDETTO VIGNE

La Triada è enconuscenta dapi varsaquants onns sco trio a capella feminin che adaptescha en moda exquisita veglias chanzuns popularas rumantschas, splegond enturn quellas lur vuschs singularas, quella fina, ciselada dad *Ursina Giger*, quella flattanta, acrobatica dad *Astrid Alexandre* e quella rodonda, temperada da *Corin Curschellas*.

In abunament per in onn

La vigilia da questa Bavania, ils 5 da schaner, lantscha la Triada ses pli nov project, in veritabel experiment sonor cun il titel «Chantinadas». Empè dal solit portatun fisic, oramai crudà totalmain ord moda, propona il trio in abunament digital da sias chanzuns actualas. L'abunament cuzza in entir onn e cumpiglia la stgargiada dad ina chanzun mintga duas emnas, accumpagnada da notas ed accords, dal texts e dad ina curta introducziun davart da la scienziada da la musica *Laura Decurtins*.

Chavà or da l'archiv

Las chanzuns, derivantas da tut ils idioms rumantschs, èn per gronda part raritads, chattadas en il renumà archiv dad Alfons Maissen u sin l'in u l'auter portatun museal. La Triada las ha arranschadas en ses stil tipic, gughegiand adina puspè armonias guerschas u ritmisaziuns zaclinas. Ma l'intent dal project n'è betg mo quel da demonstrar la virtuosidad da las artistas, mabain da derasar quest stgazi musical



La Triada cun Corin Curschellas, Ursina Giger ed Astrid Alexandre (da san.), cumenza l'onn nov cun in experiment musical. FOTO ANGELIKA ANNEN

tranter il pievel – perquai er las notas accumpagnantas.

«Virola virola»

Igl è dal reminent stada la situaziun da corona ch'ha generà l'idea da la purschida digitala, quasi in salid musical da stiva en stiva, che fa

oramai senn er en vista a la pandemia perduranta. Interessant en quest connex è ch'ina da las chanzuns tschernidas datescha dal temp da la pesta gronda, ina chanzunetta d'uffants cun il titel «Virola virola».

Las veglias truvaglias sa movan pia lunsch davent dals stereotips patriotics-patetics che marcan magari la chanzun populara dal 20avel tschientaner. Ellas raquintan simplamain istorgias dal mintgadi. Conform a l'abunament dad in entir onn han las trais chantaduras plazzà las chanzuns tematicamain tenor il decurs d'in onn, resguardond stagiuns, festas ed usits. Tschaiver e Pasca figureschan qua, la chargiada e la chatscha na mancan er betg.

Da Martin en fin Duin

Tranteren però resuna er inquala melodia pensiva, ina chanzun d'in'amur vana, ina ponderaziun sur da l'ir e turnar. U simplamain ina bella filistucca: «Ingiua esch stat, Martin» u «Sün ün muot chantaiva Morell». U quella dal Lumnezian che tschertga ina dunna, giond tras l'entira val, sbittond in vitg suenter l'auter («Ina da Duin»). 24 chanzuns da tuts genres e per mintga gust.

Questa mesemna è damai la lantschada da las Chantinadas. Ed adattà a questa data cumenzan quellas cun la chanzun dals «Sabis» – chantada per uschè dir da las trais reginas da Bavania, Ursina, Astrid e Corin.

L'abunament da las Chantinadas pon ins cumprar sin la pagina da la gruppa: www.latriada.ch.